

四庫全書

集部

欽定四庫全書

集部  
省齋集卷  
三  
四

詳校官庶吉士臣吳烜

主事臣呂雲棟覆勘

謄錄監生臣雷琳

謄錄監生臣汪麟

欽定四庫全書

省齋集卷三

宋 廖行之 撰

七言律詩

豐城舟中

踏遍江湖路幾千  
買舟因得憩江天  
不嫌煙水牽離恨  
要狎沙鷗伴醉眠  
南浦春深波漲岸  
長蘆風寢浪平川  
生涯喜近長年老  
夜半拏音月滿船

上湖南孫漕四首

湘郡湘城四十餘賦租無爽歲無虛三年自是澄清澤  
一吏何能撫字書底事古人勤勸課由來國計在閭閻  
南陽誰守蒲誰宰更賴褰幃使者車

湘水湘江袞袞流南連五嶺北荊州造船行粟無遺算  
自葉流根皆運籌國計已多劉晏策民情滋欲寇恂留  
善刀莫起庖丁念何止恢恢十二牛

湘俗湘人百不憂口無異論只歌謳皆言此日孫夫子  
還是當年郭細侯不信民情容易得可能仁聞鎮長流

而今九郡皆膏澤看取黃雲萬頃秋

湘雨湘田處處同誰知公意與天通愛民天亦憂民事  
望歲公應喜歲豐自古強兵先足食從今積粟可平戎  
關中事業非難辦要看他時第一功

代送王守赴湖北漕

紫泥芝檢下遙天綉斧榮更竹使權六轡周王新禮樂  
重湖楚國舊山川澄清風采生麾節眷倚精神跂遠緹  
早晚沙堤歸步穩二台齊色耀星躔

和丙午衡州鹿鳴宴詩

丹詔飛來萬國春，掄才美意屬賢臣。  
幾年志氣風雲壯，一旦聲名日月新。  
好把良籌裨負扆，莫貪香餌墮垂綸。  
來年上國風光好，喜帖西馳拂路塵。

和石鼓宴士二首

幾年蓬藿翳儒宮，文物新還俎豆中。  
幸甚諸生初見武，歡然置酒更親崇。  
晴收楚嶠千峰雨，薰奏虞絃萬籟風。  
須信廉平漢循吏，可能齊魯化蠶叢。

江頭秀木碧參空喜見新晴到眼中  
秩秩北林筵有序  
潭潭東閣禮尤崇  
廣平元老今賢傑  
江左夷吾正祖風  
况復贛君宗教養  
清陰到處綠成叢

上湖北趙司倉三首

君侯德業簡淵衷  
亟上朝端望寢隆  
鸞鷲羽儀從北闕  
駉駉禮樂正西風  
六條郡國褰帷裏  
萬里沅湘攬轡中  
早晚詔書歸袞舄  
由來周召合三公

黼宸天高德意深  
恩言臨遣重丁寧  
九霄雨露新英節

一日風雷徧洞庭財力定能均息耗米鹽因得裕常經  
如今想見南翁喜長望吳頭認使星

廷尉年來犴獄清更憑藻鑑惠諸生新奇往往多聞罷  
朴魯區區亦竟成已見規撫通造化會看勲業正鈞衡  
先生小試澄清手天下顚顚望太平

送黃尉解官因簡黃德亨

夫君解組去通泉十幅風帆下碧川寶劍詩成光射斗  
扶搖路穩翼垂天湖山桂老乘秋興越水梅開近日邊



丹宸須賢方側席會聽鳴履上星躔

平生飽聽無雙譽一見全勝得異書  
妙語從君聞梗概清尊酌我更躊躇  
希蹤伯氏情何限惜別吾曹意有餘  
若見滁州新博士為言湘水媿汙渠

病中寄武公望二首

四十餘年尚轉蓬渠論南北與西東  
但知愛子三遷教不辨謀生一畝宮  
北海可憐真意廣步兵良苦漫途窮  
人生擇術須循分鵬鷃逍遙自不同

輕去千金若棄遺高情勇決固應稀  
端來共我茅一把不肯折君腰十圍  
世事彈碁無定局人情蒙穽有深機  
生涯也趁身强健況是平陽德可依

無題

生憎城裏只塵埃勝處何妨特地來  
況是近郊新雨歇可能乘興一樽開  
春隨使者輶車至花倩梨園羯鼓催  
來歲披香侍華宴也應猶記此徘徊

逸興飄飄鶴九臯涼州那得費蒲萄  
一從卜築東山勝

便覺聲名北斗高  
手種百花從日涉  
心澄萬慮弭湯塵  
主人已作騎鯨去  
誰與鴻濛共勝遨

用韻雜興

夏葛冬裘等一衫  
飛黃跋鼈謾同驂  
人情展轉憐風月  
世路沈迷泣北南  
我已灰心忘厚味  
誰其緘口罷游談  
如今欲問西來意  
便掛僧牌報放參

萍鄉道中

萍實鄉中雨初歇  
野溪流水奔驚湍  
蠶功欲登蠶婦急

春陰已濃春事闌飛綿漫空白雪舞疊巘插漢青螺攢  
家山歸去此無幾眼底已作瀟湘看

宜春道中

路轉溪回幾曲村溪頭流水去渾渾農忙野叟朝耕隴  
蠶老人家晝掩門游子漫憐春色晚故園應想綠陰繁  
歸歎屈指無多日夜雨團欒酒一尊

覓酒於宋伯潛

典衣無策漸朝衫早計君毋笑拊驂未辨墻頭仍甕下

空哦斗北與箕南  
蒲萄不作涼州想  
庚癸猶酬禍父談  
折簡更招花下飲  
可能離坐亦容參

和武公望從人覓酒二首

野店醪香尚帶煙  
中山醞久漫經年  
公營惡草安吾分  
太白高吟羨子先  
好辦一尊常對月  
誰能百斛更浮川  
正須澆我談天口  
富貴浮雲且任緣

春愁滿眼久驅除  
嬾問生涯念及孥  
但得論文畱客醉  
不妨問字到山居  
寒收凍面應浮蟻  
暖入芳腴可泛酥

便欲呼兒洗杯酌陶然應許及波餘

又次韻二首

幾日春寒似禁煙杜門渾欲任流年得錢相覓非難辦  
載酒來過定孰先無奈梅邊虛勝踐遙憐柳外漲晴川  
佳時縱意須從事莫笑幽人也化緣

年來那復不時須斗酒珍藏敢罪孥安我饋漿窮逆旅  
有誰携榼訪幽居麈梁何擇皆庚癸題品寧當辨酪酥  
自笑悲辛慙杜老却愁人不食吾餘

棄屣有感

踏遍關山日幾西周旋步武鎮相依居貧原憲屨長決  
戰罷吳王屨不歸已類憊鞞無復召空慙釋屨頓成非  
塵勞棄屣今何有縱爾雙鳧自在飛

宋伯華趨朝用川字衫字韻作二詩送之

微雨輕寒透客衫十分秋色相征驂人占逸駕應空北  
君自良圖已運南須信由來非枉尺誰云領取勿多談  
而今吐握逢知己會聽新除趨六參

馳名衮衮甚長川，君獨乘風萬里船。  
得意正看期汗漫，趨時寧肯媚連娟。  
升沈百辟方公道，扶植斯文要衆賢。  
元獻景文今棣萼，還須柱石漢中天。

送鮑判官解官歸浙西

蚤行吳越得清名，歲久湘中始識君。  
人物自堪交仲父，才華端可繼參軍。  
一州從事曾游刃，萬里封侯好策勳。  
江上今朝話離別，西風吹起楚天雲。

送樂貢父赴書館



秀出書堂雋有聲又携琴劍主文盟師承自得春秋學  
經行俱高月旦評援繳解令專志慮窺園那肯亂精明  
安昌異日多成就何止從宣一二名

送伯華醉歸不寐又用韻雜言二首

十幅風蒲下碧川別懷何惜醉金船婁公正遣江流穩  
庾老寧辜月影娟善世如君皆夙望澤民應我媿前賢  
榮華莫美城南杜早晚還親尺五天

休論決處甚防川剛道呼來不上船正使涓流鳴漣漣

終然脩竹淨娟娟  
浮沈與世魚潛躍  
清濁從渠酒聖賢  
富貴功名皆自有  
可憐邀月問青天

和曾知運寄兄詩二首

并序

郴水曾嘉運鄉里推其宿學  
丁未特奏名偶任吾郡欣然拜命以歸  
其弟耒陽尉知運作二詩寄之以贊其意  
繼和者多矣因見詩軸率爾同賦  
因知運附卷末斐然可美

得喪區區指屈伸  
褰裳歸去楚江濱  
蓴鱸到底秋風美

牛斗依然夜氣新  
滿壑煙霜供敵傲  
傳家詩禮照清貧  
不須變姓吳門隱  
自有相從化鶴人

忠孝蟬聯萃一門  
鴈行相望歎天閭  
青雲有弟先行志  
藍綬今兄亦拜恩  
肘印一時饒季子  
風雩千載見諸孫  
二難金玉交輝映  
出處相高德義尊

送長兄赴調上都次田俊卿韻二首

霜熟林空月滿川  
衝寒突兀聳詩肩  
便應策驥行夷路  
不用燃犀照碧淵  
從昔正人終遇世  
到今方士漫求仙

老成謀國須吾輩可笑輕踈賈少年

從今日日聽新除去馬加鞭不用徐最是好為三釜計  
不妨頻寄萬金書君行霄漢無留轍我得江湖欲縱魚  
更念起家人底事百年門戶正闕渠

重九道中懷長兄二首

客裏匆匆飽歲時今誰能免利名羈有人騎鶴去千歲  
顧我巢林方一枝後日空懷棠杖燕經年慙愧菊花期  
白雲飛處湘天碧心在南陔日詠詩

追歡那復少年時  
老驥如今亦受羈  
白髮驚人風落帽  
黃花伴我歲寒枝  
誰能尋勝過元亮  
自嘆知音失子期  
點檢胸中猶礪碓  
強傾濁酒自哦詩

田舍雜興懷長兄四首

少休塵市喧囂耳  
來聽田農應和歌  
畧畧耕疇皆帝力  
欣欣時物自天和  
山雲亭午半未斂  
溪雨黃昏清更多  
但得長年飽禾稻  
也勝官裏厭風波

不到田家又夏初  
試從野老訪耕鋤  
稻畦高下水皆足

天意雨晴時自如學稼我猶慙孔子問津君且向長沮  
宦游何似團欒好更念懷歸畏簡書

去城靳靳路一驛故歲迢迢今甫來桃李陰成真綠野  
溪山清絕勝章臺青衫手板徒勞爾竹杖芒鞋亦快哉  
莫向紅塵深著脚而今毛鷲苦相猜

遙知此日黃初起頗憶平生馬少游薄有田園奉甘旨  
苦無機械與沈浮如今官事真誰了底事周南獨子留  
白髮倚門還念否令人翻動北山謳

壽巴陵朱宰

萬里沅湘浩蕩秋秋來佳致日清適湖平一碧波光靜  
雨足千崖暑氣收底事歡聲騰下嶠祇今賢宰在中牟  
民情天意歸仁壽看到三公尚黑頭

送許兄還侍兼簡廣南監場二首

君家疇昔汝南龍淵有驪珠自不窮黃卷乃翁廉取位  
碧梧之子秀參空儒冠底誤資身術鹽筴聊成富國功  
莫倚沃饒云近監圖南九萬看搏風

舊遊歷歷記湟川南下番禺穩可沿知有文星衝斗去  
遙憐海水遶城邊而今五嶺多宜客見說羣卿賸好賢  
問訊夫君聊吏隱云胡三月未官遷

次韻酬宋伯潛三首

詩壇得雋敵無強獨立南豐一瓣香我欲句中聞妙法  
君應肘後出神方陶鎔景色春長好流轉風光物自忙  
珍重三薰更三沐全勝湯餅試何郎

百拙無堪不自強身謀猶得學黃香青衫良助君衣綠



圓鑿何嫌我杓方舊雨故人相得甚浮雲蒼狗可憐忙  
從君更許聞詩律喚醒風騷起夜郎

老嬾渠能更倔强隣牆可戀甕頭香卷舒自我聊全璧  
非笑從人亦大方日永遊絲隨望遠春深乳燕趁晴忙  
閒來不入邯鄲夢未厭區區白首郎

酬羅季康二首

慚愧材非可與言等閒微籟自鳴天井蛙無理祇成鬧  
里婦空顰豈解妍君自平生多與點誰云一語始知然

欲伸床下慙懃拜詩律於今屬大賢

自憐疎拙百奚宜不省胡顏可媚時馳騫功名非我事  
歡娛菽水祇心知風姿故陋難施粉面目堪憎正類俱  
惟有靈臺亦裴度到君明眼不能欺

次陳頤剛與許拾遺酬唱之作

竒謀端合贊幾沈何事山林意味深引類古人方厚祿  
憂時百念可灰心會看覽德翔千仞未信干霄老百尋  
却笑疎慵真漫仕間中贏得二毛侵

一云莫倚哦詩了  
清夜彌明咄咄意

侵吾

和四十五叔慶謙子過省二首

行年五十尚青衫耿耿胸中負不凡那意寧馨聯桂籍  
祇知清白映冰銜平生濟叔耽周易何日商宗起傳巖  
好上公車治安策綠緹飛詔下方函

長笑癡兒戀戲衫拖泥帶水漫卑凡何如一動君王聽  
不入徒勞簿尉銜細水循除空瀼瀼泰山終古鎮巖巖  
可憐司馬身華寵晚作諛書擬奏函

還十五弟文藻

文府高高守鬼神蔽虧那揜豔華春屠門肯作朶頤過  
龍頤輕攘照海珍十襲莫論藏弃寵雙眸姑浣向來塵  
從茲染指諳腴味藜覓難甘誑腹貧

示夢龍姪

小驗文場粗慰心讀書從此更諄諄要令大敵尤能勇  
須索新功又過人得力無過親翰墨致身端可上星辰  
秋風春浪鼇頭好拭目吾宗盡國珍

贈別羅舜舉二首

疇昔交情一輔車年來造物且乘除  
論文誰共肺肝語道舊空傳咫尺書  
半歲不堪心鄙吝一樽聊得語躊躇  
匆匆又作相違恨愁絕臨風送目初

鼇峰夜色輸明月龍穴秋光藹碧雲  
景物故應人惜別風流難與世相聞  
新詩題處君思我啼鳥聲中我夢君  
一笑相從非易得有懷聊復此云云

別蒲圻徐丞于金鷄驛次李和卿韻

金鷄亭上小春容日射湖光照眼濃  
痛飲壯君堪八斗劇談應我避羣鋒  
笑看天際孤飛鷺驚起波中老蟄龍  
明日東西各奔走莫隨流俗浪相逢

有禽聲急而似可曉鄉人以催稅目之其聲亦頗類焉因感而成詩

怪底微禽似有知區區舌吻竟奚為  
欲將終日能鳴巧深為當時遠害思  
布穀尚應勤播種春畦何事較公私  
誰如獨占催科考無復陽城恨拙遲

挽江西宋漕三首

蚤歲才名畫省郎，會紆玉節惠三湘。  
哀矜折獄人無怨，訪問垂心慮最長。  
不便幽潛遺陋巷，更將文物萃書堂。  
期公四海皆膏澤，太息思賢殄瘁章。

牙籌坐席未全溫，尚想星沙戀德門。  
剡牘方新蠲賦請，憂民不計此身存。  
平生大樂功何晚，壽相龐眉理莫論。  
雲黯江南失春色，可堪杜宇更銷魂。

樞具曾承衣繡迎，學宮仍見選諸生。  
求文於白遠何取

聯第如詹時共榮公自典刑多教化人誰留播賴生成  
而今未報何侯力萬里神馳兩淚傾

挽宋知縣剛仲二首

與君同志復同州少日論文放一頭孝子憂親雙鬢白  
癡兒了事一生愁凌雲意氣須臾盡積歲聲名取次休  
賴有遺編留史筆幾回廢卷淚橫流

闕閱方成一段奇三湘況是古來稀弟兄同歲乘槎去  
父子連科折桂歸詩禮傳家人共羨歡華過眼事俱非



秋風寂寞萱堂露染盡當年戲綠衣

挽陳宣教直中

回鴈峰前憶隱淪平生謀道不謀身  
詩書滿腹空名世科第衰年獨後人  
賴有佳兒傳素業能令潛德上貞珉  
交游半世今零落忍望銘旌淚墨新

挽武宣教徹二首

三釜何如菽水長毅然投劾奉歸裝  
共欽筮楚辭巴嶺又聽勾稽復楚鄉  
鷓鴣下灘誰御史鳳鸞棲棘漫仇香

絕憐五十三年筆不草文園封禪囊

書來撩我重思君情比雛雛鴈叫羣詞賦一時高李杜  
弟兄今日掃機雲未還金馬日邊詔去作玉樓天上文  
千里莫能親視空篇詩寄挽亦徒云

挽武宣教後四首

南楚東吳萬里長幾年來往共資裝公方著脚功名路  
我辦卜隣文物鄉雅意嘉招言在耳贈行新句墨猶香  
追思氣概生涯語誠意諄諄總括囊

生平耿耿不忘君位下才高氣不羣  
手取科名如拾芥  
眼高富貴等浮雲  
祇知世可行吾道  
其奈天將喪此文  
知遇莫酬今已矣  
篇詩聊寓一哀云

嗚咽鍾悲子夜昏  
靈椿摧折重銷魂  
數絲白雪遺慈母  
一寸青松括耳孫  
返哺聲乾那可及  
挽鬚情在不堪論  
桂枝皎皎敵寒玉  
竚看揚名振禮門

哭公無計挽公留  
痛寫哀衷佐紼謳  
丹旄姓名何所益  
青編事業等閑休  
長江百里浮清恨  
明月孤峰起些愁

底事波神均此怨白頭寒浪拍空流

挽周宣教宗沂二首

子職勤勞衆莫攀已丘高節世尤難一官未抵琴書樂  
三釜何如菽水歡儻有軒裳存妙句平居豐儉只儒酸  
音容渺邈今何在雲黯江南萬木寒

始別猶承笑語溫昭暉相望幾晨昏  
倂來駭聽言傳異淚哽悲懷飽不殮  
歸拜文惟人已去痛瞻靈室像徒存  
反思博我諄諄意何日能酬知遇恩

挽劉宣教東二首

銘旌搖曳淚沾巾為惜賢才生死分  
樂道喜陪今漫道高文誰與共論文  
西相岸脚送霜雨明月嶺頭留暮雲  
有子登科真不朽它年勲鼎慰嚴君

道義君家振楚荆嗟君功業負平生  
詩書累世有底盛簿領一官徒爾榮  
親族追思應重惜慈顏悵望不勝情  
靈輶遠送松岡外風雨淒淒猿鶴鳴

挽黃承事三首

肯為儒冠嘆誤身直將富貴等浮雲談棊柯腐塵勞想  
讀易編摩世俗紛鄭叟遽嗟年在已卜商寧作地脩文  
須知異日高人傳耿耿君平繼有君

不用贏金侈厚藏無煩農圃富耕桑一經父子韋編訓  
餘慶階庭玉樹芳道義固堪綿有後功名渾把付諸郎  
他年竇桂詵詵報當信於今種德香

疇昔雲天一覩披十年徒有夢追隨擔簦已負異時志  
仰斗今餘後學師夜壑舟亡人孰秘少微名在世空悲

嗟嗟莫致徐芻莫掩袂傷心隕淚洩

挽李主簿長民二首

蚤擅湘中二妙聲一官政爾為親榮倦遊未試曾中蘊  
苦學徒遺身後名踵武世科知有子盡心色養足生平  
可堪膝下稱觴處不見伯仁賢弟兄

帝里從遊情最親江頭一別幾經春追思語笑恍如昨  
時枉音書寧厭頻憂患自嗟非故我昂藏不復見斯人  
每哦風月無邊句西望潸然淚滿巾

挽劉主簿令二首

鴈行場屋久睽翻賦客終為挂籍僊鸞誥已封慈母貴  
鯉庭仍見世科傳轉頭生死歸何地反掌榮枯欲問天  
賤子門闌方有託驚嗟梁木忽先顛

投檄巴陵本為親遲留方擬問通津一官粗報平生志  
萬里俄傾未老身里棘豈堪棲鳳駐冢花重歎臥麟新  
我慙李漢無才望敢效韓編作序人

挽朱監廟明二首



人間世事最堪悲，有子騎鯨去不歸。  
客廐謾遺陶母薦，萱堂空對老萊衣。  
黃金榜上嗟陳跡，白玉塔前泣斷機。  
賴有青氈存眼底，滿庭蘭玉侍親闈。

平生知己幾何人，高誼如君最好親。  
鶴蓋不隨青眼顧，鷄窓唯有白頭新。  
今誰肯借周瑜宅，待我深知管仲貧。  
腸斷眼穿明月嶺，九河傾淚一沾巾。

五言絕句

玩易齋

三椽函宇宙一卷肇乾坤深味畫前意寧於紙上論  
作者亦何患思深義亦深忘言更忘象默會古人心

遣興四首

賤宜人弗齒貧遣日勞心不著新詩句春愁那可禁  
窮達渠非命機關不到心新詩聊自遣高興若為禁  
無客共談道有誰能賞心人生要自得窮困吾能禁  
一生俱有分萬事要無心強聒誠行險危哉安可禁

書詩隱何元仲詩卷

歌舞純周雅風流見夏時可能供痛飲無畏誤雌霓

六言絕句

方壺

閱世觚稜如許照人冰玉淵然箇裏可藏天地塵中自有神仙

書陳頤剛墨梅扇

玉斧琢成明月陳玄幻出橫枝依舊西湖風景素衣聊受塵緇

寄題李筠叟主簿所居竹齋

寄傲寧須門柳哦詩不必庭松伴我虚心直節領渠明

月清風

書詩隱何元仲詩卷

相馬玄黃牝牡斲輪甘苦疾徐元亮得琴中趣彌明非

世間書

半隱詩

遠引未能忘世端居且學灰心定自隨時隱見應非與

俗浮湛

山居三首

鳥語喚回春夢鷄聲叫出朝暾一段可人晴景幾家深  
處田村

暖地池塘早綠春和荀蕨先肥慣作田家活計懶隨鄧  
市關機

貴賤孰欣孰戚窮通何損何加成毀舉同墮甌妍媸不  
屬鉛華

七言絕句

立春二首

曉雪纔過天氣清  
喧闐鈺鼓喜迎春  
世間多少虛名事  
綵仗驅牛又一新

隨意旛花剪綴新  
盃盤草草簇芳辛  
還欣好景平生事  
贏得旬餘分外春

和清明後即事

柳陰嫩綠藏鶯語  
花徑餘香著燕泥  
南畝十分農事好

平疇野水稱耕犁

和清明前即事三首

乍雨還晴近禁烟  
踏青人憩楚江邊  
花枝處處爭妍媚  
粧點春光二月天

漫山百卉效奇珍  
尤喜原頭雀舌新  
不待清明改泉火  
擷芳收取最先春

雨歇花畦徑未乾  
春衣初試覺輕寒  
所欣節物能多好  
袂褱臨流江不瀾

春晚雨中

綠楊庭院雨如絲，已是梅林欲熟時。  
慚愧春工起歸興，向來節物彼何知。

雨中惜海棠花四首

東君何事妬花妍，不遣春風一笑嫣。  
邀動芳心愁萬縷，盈盈含恨雨中天。

點綴春容特地妍，艷粧金縷臉霞嫣。  
無端風雨妬顏色，半吐芳心向晚天。



誰恨花枝苦未妍  
故將雨熟醉顏媽  
禁寒來把芳絲吐  
會向和風放暖天

費盡胭脂畫不妍  
春心一縷褪唇媽  
雨中似是花神意  
猶作西來舊蜀天

和送春四首

瀟湘江上送春歸  
酒盞何人共我攜  
不是吾儂怨春別  
明朝車馬各東西

三月春工倦欲歸  
花神應約手同攜  
明年早赴東郊迓

未論渠儂南北西

晚晚春光作意歸  
送春誰把酒樽攜  
多情風雨留連處  
幾看霖霖到日西

匆匆春馭去何忙  
挽繫難憑柳線長  
好著新晴送行色  
莫教風雨漫彷徨

和詠鶯

雅正餘音隱小成  
咿哇嘈囀彼何榮  
數聲皖彼遷喬語  
一洗紛紛百口鳴

豐城道中聞鶯書于故縣

底事離羣今暮春故人懷想渴生塵  
陽關聲斷空回首  
慚愧遷喬鳥語新

午睡

暑日薰蒸睡思濃  
黑甜真處世情空  
那知一枕窓前夢  
無限塵緣在眼中

溽暑中一雨遂脩然枕上口占喜涼

枕簟脩然夜氣舒  
煩蒸無復到襟裾  
慙多謝天公意

一雨生涼足有餘

月夜不寐

月薄西山夜氣清  
就牀欹枕不勝情  
姮娥似欲相鈎引  
特地窺窓巧獻明

寒著衾裯思不禁  
月娥於我似鍾情  
更添睺睺窺簷入  
容與橫窓一帶明

重九前二日夜雨

去去重陽越夕間  
瀟瀟風雨作輕寒  
心知又負登高興

籬菊留來過後看

和惜香紅二首

花神那作世間香  
狂蝶遊蜂暗斷腸  
不是朱顏向人吝  
恥隨桃李倚門牆

韜藏馥郁保天真  
珍重芳姿肯殢人  
莫道清高便無韻  
春來誰是解全身

和武公望催梅三首

長羨南枝笑北枝  
東風能早亦能遲  
而今滿樹渾無那

金瓶梅詞話卷三  
管領春光更有誰

准擬花前玉笋飛那知辜負隔年期  
枝頭未報春來信  
聞却西湖處士詩

絲絲弱柳猶迎歲  
點點飛雲亦餞年  
可是清高厭紛競  
百花那許著鞭先

和武公望雪梅五首

臘月十四日冰雪方壯乘興訪梅于東軒清  
標傲寒珠玉輝映尤爲竒絕適公望它往獨

賞而歸甚念荒拙不能作數語記述其明日  
公望示我五絕句稱是梅矣因繼韻答之

雪裏最憐梅破萼花時那負歲寒心不因王子聊乘興  
爭得林逋為賞音

自是陽和生處有不同凡卉競時開居然如雪猶全節  
底為藏冰但却灾

刺史藝蘭能九畹白衣訪菊亦東籬君詩喚起西湖老  
好處何慙幻婦碑

臘殘春到無多日留得清芬伴頌椒却放東風吹凍裂  
遣渠堤柳又新條

水精宮闕偏宜汝鐵石心腸肯受欺應笑臘梅猶族姓  
祇堪薪爇薦晨炊

再次武公望雪梅韻五首

每憶西湖處士吟暗香浮處最關心而今也有冰霜操  
祇要人知韶護音

從來陋巷祇顏回子悅胡為羨漆開端向歲寒觀雅操



須知冰凌不為灾

梅邊好與酒杯持  
寂寂牙簷短短籬  
但有詩人出佳句  
絕勝設墓得金碑

自有天香軋魏姚  
何須裂麝與塗椒  
蠟梅卑俗紅梅媚  
漫與增添本草條

休論青瑣與黃扉  
祇有西湖不受欺  
每向冰霜見全操  
笑渠長夏受蒸炊

梅

江北江南入夏來雲蒸日煦欲黃梅邸居兀坐闕山隔  
空想微酸到齒隈

和周少哲咏梅韻五首

孤根應得暖先回天惜花房遣護開早是冰肌自清絕  
却因冠玉更奇瑰

太息凋年雨木冰歲寒心事屬何人攜筇試遶牆邊樹  
喜見瓊林第一春

銀色諸天渺不窮森羅萬象匪磨鎔眼明的歷南枝好

絕勝瑤臺月下逢

天姿不解入時粧，綴佩聯環特地芳。  
幾日東風回隴首，却教羣卉羨天香。

弱植卑叢凍易摧，百花誰伴雪花開。  
如今最識春先處，紅紫紛紛亦漫裁。

又和前韻十首

梅君消得為高吟，素艷曾無媚世心。  
粲粲墻隈自瀟灑，江南到處有知音。

貪看繁紅錦被堆有人青眼為君開  
西湖千古林和靖  
還悟犧尊木質灾

曲檻瑯欄詫護持  
寬閒何用著藩籬  
林間立馬多真賞  
須信行人口是碑

結實收功鼎鼎調  
不論江路與山椒  
可憐楊柳空牽嫵  
飛盡狂絲祇綠條

客舍袁安雪壅扉  
清標廩廩詎容欺  
如今凍解梅无恙  
還似高眠甑不炊

新詩筆力可天回，萬里東風掃凍開。  
照眼玉英清徹骨，花神報子亦瓊瑰。

嫩蘂含芳恰褪冰，此時偏惱少陵人。  
顛狂覓酒尋詩去，賞遍西湖幾樹春。

癡絕兒童不耐窮，搓酥綴臘競銷鎔。  
如何見得真風度，須索天工歲一逢。

如今總總鬪新粧，天與風姿壓衆芳。  
自是百年中第一，不因蘭菊返魂香。

勁氣由來不可摧  
年年偏向臘前開  
清芬肯為冰霜減  
好在含章簷下栽

和真珠花二首

瓊林玉女職司花  
裝綴珠璣泣露華  
妙手有神俄點化  
靈根何日下天涯

纍纍瓔珞作新裝  
萬蘂勻開細細香  
好是花時最清絕  
月明珠露夜初長

欽定四庫全書

省齋集卷四

宋 廖行之 撰

七言絕句

和人乞朱櫻十首

見說朱櫻正及時  
眼穿火齊曉雲披  
筠籠走送還能否  
好帶朝霜摘幾枝

桃李從渠著斗量  
明珠顆顆更含香  
紅顏不老如丹渥  
笑詫南翁見未嘗

當年上苑得殊觀，爾許勻圓訝走盤。  
容易香山白居易，漫同樊素等閑看。

浮沉閑却紫玻璃，洗盞丁寧已戒兒。  
會見金盤紅萬顆，為君痛飲倒餘醪。

侯門珍膳詫猩唇，肉食愚哉鄙若人。  
安得蘋珠洗葷濁，驪龍方寐詎非真。

那須得得列盃盤，不念貧兒逐彈丸。  
齒頰猶能識珍味，乞渠細咀辨甘酸。



舊聞雲夢澤邊城飽飫林間主不嗔薄暮一鞭飛騎迅  
歸來盈袖熟紅勻

族派蟠桃譜牒存三千歷歲物難羣黠兒尚許三偷摘  
可是年年不見分

連朝急雨相狂風愁絕枝頭入望中不比來禽與青李  
端能炯炯照顏紅

惱亂詩情庾子山饒涎渾似未朝餐張頤一飽非難辦  
爭得君家伏火丹

和食蕨三首

放箸朝來頗不貧，野盤春蕨正宜人。  
玉條縷縷東風軟，慚愧山家為薦新。

根莖蔓衍布山巔，一夕春雷引怒拳。  
足我窮中八珍味，竹萌木耳更求旃。

不須熊掌夸珍饈，安用雞跖快嗜情。  
富有漫山千臂指，何妨採擷日充盈。

江上舟中

京塵無奈染征衣，況是南宮逐客歸。  
後夜子陵臺下去，祇應慚愧釣魚機。

舟中風便

一席清風游子歸，扁舟輕逐浪痕西。  
濁醪滿飲詩情快，盡攬江山入醉題。

和馬茂先淨因閣中所題

紛紛紅紫泄天機，已是山城春半時。  
顧我逢花須泥飲，高情難許俗人知。

題雲梯石和王東卿壁間韻

客裏春愁萬緒長  
歸心宛轉九回腸  
烏聲啼破刀頭夢  
似是曉人猶異鄉

書田俊卿北征紀行詩

南北東西一箇天  
區區二偶漫相憐  
而今若說悲游子  
不似當時王仲宣

讀浮休詩有感

九月五日夜觀浮休張公詩至彭城君忌辰

篇云東房西舍語誼誼舊事無人可共論遺像  
展開多不識獨將哀淚對兒孫感吾嬪之早  
世適相類用張韻悼之

二十年間兒女誼糟糠勤苦不堪論如今八載君身後

兒已登科又長孫

惜其不見也

舊友家覩書劄感成

下馬連聲扣竹門主人何事感遺恩回頭泣向兒童道  
重見甘棠舊子孫

夢

家山歸夢恍悠然小閣逢迎尚世緣  
驚覺鄰雞號月曙不堪歌枕小窻前

贈舅氏授室

不須種玉向藍田不用吹笙學鳳僊  
試看玉郎親迎處梯雲挈得月嬋娟

和宗秀才惠詩七首

五世儒冠媿甲門滄浪何意濯塵纓  
不嫌山鬼挪揄笑

寧得齊兒舒緩名

吾祖元豐一桂枝  
百年門戶尚餘輝  
箕裘敢說韋平事  
且學寬饒衣短衣

正學心端不論材  
吁嗟媒祿漫梯階  
歲寒萬木多摧折  
凜凜喬松不可埋

千戶侯封有國權  
裁能薑韭當畦千  
如今誰是淒涼尉  
却有新詩可手編

平生南嶽望重湖  
煙靄蒼茫認有無  
可是能來訪苗俗

祇今風化已唐虞

藉甚家聲杜小冠  
公侯衮衮照門闌  
培風小作湖山隱  
九萬扶搖正好看

有道如君方杜門  
無能慚我亦乘軒  
慙好在經綸學  
早晚親承雨露恩

和松坡劉迂詩二首

秋來吾亦愛吾廬  
松菊交情未省疎  
底逐風埃輕去魯  
尚餘客氣欠消除



碌碌隨人未足旌折腰趨走太清生絕憐抗直陳公子  
晚欲憑書入帝城

送湖南張倉解官還建昌九首

一節三湘兩載留高懷寧羨子公謀由來奇士為時用  
未信林泉得久游

灼灼聲華簡帝聰得君元不藉先容趣裝已就朝天路  
行有新除下九重

江海無忘魏闕思不妨身佩國安危太平基業須賢輔

政賴君王用及時

湘俗湘人自戚休親民誰復念承流公歸若也嫌名迹  
論奏何由達冕旒

扶持根本恃綱維歎息論功到鼓鼙蠢蠢潢池皆赤子  
埋輪何必問狐狸

袞袞諸公競朶頤具文天亦厭謾欺晉夫不拜非難事  
會有公車訪釋之

從來唐治數開元百辟誰知產亂原惟有曲江金鑑在

從昆能不效忠言

稔見銀河派裏人眼高餘子似紛紛君今綽有前風烈  
願振家聲稔舊聞

見說龍門不可攀自驚容易得承顏從今洗眼湘江上  
看取功成鬢未斑

送陳必強赴宜春理官掾三絕

萬頃烟光入客舟不堪風雨擾離愁慙慙小汀江頭話  
試問垂楊可繫不

君向春臺好宦遊，刑清今已獄無囚。  
會聞寬恕求黃霸，肯復公卿慙太丘。

三年同此日，追遊樽酒相歡幾。  
獻酌別後臨風重凝想，湘雲東去是袁州。

上浙西張帥十首

先世精忠百世尊，重扶日月正乾坤。  
歲寒最見喬松節，凜凜清規在子孫。

大學無傳久晦冥，英英伯氏獨推明。  
隱齋會得名中意。

明道伊川真弟兄

天邑由來最浩穰正憑威信執豪彊次公不到圓機處  
須索神醫肘後方

條教初頒洽里閭米鹽靡密見紆餘而今坐嘯鈴齋肅  
鴈鷺行空無簿書

薦士今誰有古風不論疎戚與窮通憐渠報國河南尹  
媿我無私第五公

朱履長裘客幾千雙鳧乘鴈一天淵交情可笑書門老

不省從來有失賢

御吏何憂束濕難如今門內已相安羔羊正使閑風化  
他日翁歸尚可觀

稔惡偷兒喜探丸邇來通夕寢何安鑄頑自有金丹訣  
何事區區柱後冠

權酷誰云一切功軍儲百萬若為豐能令利入皆公上  
從此深根得裕農

曾上雲端欵祝融更臨濤海揖清風於今又見張夫子

眼底紛紛一洗空

壽五一弟四首

年年六月二十一舉酒華堂祝誕辰此意肯為身快樂

須知所喜壽慈親

等觀性空兩居士

叔祖父叔  
祖母道號

世諦寧忘兒與孫慙懃須

若興門戶力去驕淫是法門

奉養烝嘗子職共盍迎爾相重承宗人生正始嚴昏娶

嬖御雖賢禮不容

哲命天年本自貽若為五福具期頤義方端是長生藥  
安用金丹與玉芝

壽湖南汪倉十首

西府風流載世長玉龍鱗甲更儲祥慶源衮衮多英傑  
可但韋平一再芳

見說奎文得歲時杓携天北啟天機黃陂嗣有公侯氣  
牛斗揚光曜紫微

萬卷詩書即肯堂儒宗氣習洗膏粱天資問學俱前輩



須信源深流正長

不用籛金累世資  
名家人物照清時  
碧梧翠竹今何羨  
森立庭前丹桂枝

六月湖田槁欲斃  
嶽雲俄起雨如川  
不憑公意回天意  
爭得饑年變有年

百萬嗚嗚日苦饑  
左餐右粥轉歡嬉  
也知振廩非私惠  
端為皇家愛本基

饑腹那堪癘鬼欺  
萬金良藥起沉羸  
致和自可消羣疹

小試猶煩活國醫

賦政頻年合簡求  
民情滋欲得公留  
雖然湖外私膏澤  
須索樊侯入佐周

紫樞勲業舊青氈  
更上中台秉化權  
它日鴻鈞陶壽域  
赤松相與不論年

三年弱羽自清陰  
行借高風入上林  
猶向齊庭一伸喙  
此鳴端亦為知音

詞

臨江仙

元宵

春意茫茫春色裏又還幾度花期淡晴時節儘融怡梅  
腮翻白後柳眼弄青時正是江城天氣好樓臺燈火  
星移相逢無處不相宜輕狂行樂去明月夜深歸

卜算子

元宵觀燈

雲破露新晴月上輪清氣寂是江城有底佳燈火人煙

沸行樂儘歡娛眼界尤妍媚多少江濱解佩人邂逅  
無窮意

鷓鴣天

詠梅菊呈撫州葛守

九日東籬已泛觴隴頭猶待返菟香那知此日花神約  
得得同登君子堂迎臘雪傲晴霜西湖風韻接柴桑  
壽潭更酌長生水歲歲和羹入帝鄉

如夢令

記夢

雨歇涼生枕簟不夢大槐宮殿唯對謫僊人一笑高情  
睽睽離恨離恨無奈曉窻鷄轉

點絳脣

賀四十五舅授室四闋

年少清新襟裾那受紅塵汙還他禮數莫遣衣冠祖  
擬倩東風西逐輪蹄去冷然御飄飄仙趣直到駉鸞處  
此去何之駉闐車馬朝來起揚鞭西指意氣眉間是

閭里兒童競矚秦蕭史歸時幾快瞻行李還看如雲喜  
玳席華筵嘉賓環集三千履蘭膏芬芷一簇紅蓮裏  
花覆玉郎冉冉青衫嫩咸傾企早登科第有底新桃李  
玉樹芝蘭水清況有閨房秀畫堂如畫相對頃醇酎  
合卺同牢二姓歡佳耦憑誰手鬢絲同紐共祝齊眉壽

前調和梁從善

屈指家山匆匆又數今朝過客情那可愁似天來大  
煙雨濛濛細泥輕塵墮君知麼却成甚箇春暮猶江左

青玉案

重九憶羅舜舉

家山去此無多路  
久沒箇音書  
去一別而今佳節度  
黃花開未白衣到  
否籬落荒涼處  
崢嶸歲月還秋暮  
空腹便便無好句  
菊意愆期  
渾未許  
那堪惹恨年來  
此日瀟瀟雨

沁園春

和蘇宣教韻

直下承當本來能解莫遣乾休算如今蹉過崢嶸歲月  
分陰可惜一日三秋鬧裏偷聲日中逃影用盡機關無  
少留爭知道是漚生即水水外無漚 世人等是悠悠  
誰著箇功夫向裏求但掩耳竊鐘將泥洗塊覓花空裏  
舐蜜刀頭何似忙中尻輿浸假邀取三彭同載遊真如  
界向毗盧頂上薦取無憂

減字木蘭花

送別



相從歸去行盡江吳到湘楚欲話離懷世事須憑酒一  
杯臨岐握手贈子一言君聽否舌在何憂莫作人間  
兒女愁

點絳脣

贈別李唐卿

秋興連天又還不分秋光老尊鱸猶好莫落秋歸後  
有底從人占馬皆東首君知否陽關三奏銷黯情多少

點絳脣

送人歸新城

音信西來匆匆思作東歸計別懷縈繫為箇人畱滯

樽酒團樂莫惜通宵醉還來未滿期君至只在初三四

賀新郎

賦木犀

修月三千戶擁冰輪同遊碧落問津牛浦上界真仙多  
才思乞與瑤堦玉樹渺萬里人間何處雲葉依依分清  
陰憶當時掩映霓裳舞算萬木寧如許  
年年蕭爽幽

巖路倚西風吹香金粟超然雲塢一洗紛紛凡花盡堪  
寫清商對撫為豁散蠻煙瘴雨脫俗高標誰能領向騷  
人正欠題新句須大手與君賦

記

省齋記

廖子天民始命所居之室曰坦齋有日矣他日讀曾子  
吾日三省吾身之言惡其取名之浮于實無自克之規  
也則去坦而易以省焉客有過余而問曰吾子之命名

何其向也倨肆而今也抑畏向也高自標置而今也兢  
兢如不及耶吾未達也余曰子獨不見津人之操舟乎  
余嘗觀二舟航于大川始也風寢而濤平其一狎焉弛  
楫而不戒怡然自以為無所迂也其一惴惴然理楫四  
顧若覆溺之尋至彼且笑其私憂過計也俄而風濤倏  
興裂岸毀埽向之狎者沉流莫支津人僅以身免理楫  
者翩然而濟固自若也他日復過之則喪舟之津人猶  
存方且溯洪濤而獨航了無不給之患余問焉以昔者

與今之所以異則曰非水之時有險易也操舟之戒與不戒耳向者舟覆吾幸脫焉退而省其過日存乎心故能反前日之失為今日之得余聞其說而有感焉余向也自知之不明而喜於懈以為坦也故遇事而多悔猶舟之狎於水也今焉困於心衡於慮凡前日之失皆庶幾知省焉由今日之省以應他日之事操舟之說猶可驗也昔者重耳之霸心生於曹勾踐之霸心生於會稽知此理耳余其敢謂余之不肖而曾不足為操舟者之

所為耶吾子果何以教之客曰子之志尚矣吾其何言  
請與子歌之以無忘今日之志乃歌曰省之齋兮思悔  
而命名省之義兮見過而自箴而將朝夕居是室兮勿  
忘乎取名之經而將造次服其義兮罔廢乎改過之誠  
自今至于後日兮其無以窮達而二其心則何求而不  
得兮亦胡為而弗成伊操舟之有取兮吾又何言乎天  
民客退命管城子叙其始末併與客言而誌之蓋庚辰  
夏四月戊午也

石鼓書院田記

淳熙十有三年春石鼓書院成始有田養士提點刑獄  
成都宋公若水之舉也先是金華潘公時議復書院規  
弼棟宇會易帥番禺而公繼之選建師儒較試諸生充  
弟子員出緡錢供億矩度甚設已而念曰是恐不可久  
乃籍在官閒田歸之時括蒼管公監提舉常平茶鹽亦  
相與慇懃會有習佃常平田者因畀之書院使入租于  
官取其贏為養士助諸生行視畦畝分畫文簿第其租

入歲率有程費用取具他日公謂某曰書院廢百有餘年今幸復舊又畀之田以侈國家養士之澤既聞諸朝矣田故有籍以周知會計第傳之吏手人不具見脫文書緣絕後將安考吾欲揭諸石與衆保之以是屬之子某退而稽尋顛末蓋石鼓舊有書堂祥符初元奉夫子廟遷焉書院之名始著景祐三年詔許衡州立學自是為學官書院因廢不別建賢使者相與次第復之有屋以居有田以養慮遠用周視前益備或曰郡有學所以



育士書院廢興奚預損益是不然禮過于養人者君子所不厭况白鹿嶽麓相望江湖揆則度類事有本始非苟而已且荒丘廢館昔賢所嘗經行來者猶樂興墜補壞則是役蓋非徒作者凡田以畝計二千二百四十有奇合為米六百二十七斛有奇其隸某縣某鄉與某人當輸者疇分彙列載于下方湖南地瘠率一畝為米不過二三斗士來益衆懼無以為繼也後有賢者稍增益之具必續書于此矣是年五月十日修職郎前岳州巴

陵縣尉巡提私茶鹽礬兼催綱廖某記

序

久敬錄序

近世記交遊之書名之曰雲萍錄以適相遇言三山朱季蒙病之易以四海兄弟名不苟矣予以為貧富貴賤之分利害禍福之際而交情篤焉古人蓋有道也夫子稱晏平仲曰善與人交久而敬之夫君子之交一以敬心將之能敬在我而可敬在彼敬其可敬根於自敬交以

敬合乃可以久作久敬錄申季蒙之意因以自做云

送鄧彥鱗序

鄧彥鱗以進士高第為江華尉將行過我曰何以贈別  
僕曰尉誠不足以為彥鱗淹也且官無小陸子經綸制  
度見於渭南儒者事業大用之小用之咸宜彥鱗不少  
此也然世流俗失久矣一行作吏則苟而可顧視素學  
如弁髦然繩其所為鄙夫尤甚彥鱗與僕平居劇談切  
切憤惋其不美也行矣尉其始發軔者軌轍要一途耳

夫所觀變于前所守易於內古人以為做願識斯言僕他日候彥鱗其猶前日學也

送彭端卿序

古雲彭端卿外門嫺黨其曾大父以文儒起家有當世材自結明主崇寧間持節淮壩上書白蔡氏之姦不報投劾得謝年纔四十有七安於林泉益自放於文淵然皆愛君憂國之意不幸此志未信而沒端卿之生後之數十歲獨抱其遺文痛先德之不耀思有以張之其道

亡繇會天子詔史臣益潤九朝信史史臣建請搜未得  
之書於郡國端卿閔然見告曰他日不聞是而今聞是  
將吾曾大父未昭之忠未展之志或有遇歟徃時邑之  
望士論次其行治之實吾欲介其書悉上送官萬一可  
補遺闕垂光亡窮嗟夫端卿之志亦可哀也矣自追遠  
之德薄襲箕裘者顧忘弓冶之懿而再世三世莫接於  
耳目詎復寘念端卿不逮事二世而拳拳念祖將發其  
幽光是則可嘉尚已於其別也書是勉之異時言挺挺

有風烈者將不獨一魏暮也

送安福周秀才序

僕幼時學于新喻楊先生少長多從廬陵清江士友游  
既又獲綴嗣宗元攷二李兄榜下及官巴陵而新淦郭  
承禧同寮蓋與江國諸賢處頗悉其人凡士君子篤行  
好學言行相顧不肯碌碌僕心所敬舊矣已而吾州得  
劉使君臨之使君一世師儒斯文倚重施於有政先後  
次第輕重緩急應古繩墨善類為之興起於是益信廬

陵清江之人其士君子果不歟此名也一日有踵門者  
曰吾安福周子僕喜攝衣迎之語僕以倦游念親且歸  
養矣欲一見僕而去顧僕無聞其見不見何所益損哉  
然僕獨咎夫後世競於言語文章意將欺世以盜名而  
不能反躬以踐行其實卒有媿於古蓋僕每誦夫子誨  
弟子一章本乎孝弟謹信推之愛衆親仁而其力有餘  
於行則以學文其本末之序求之後世頗不合未嘗不  
撫卷太息今周兄果有見歟則其歸宜不可緩矣僕又

以知廬陵清江之果多士也異時為誠意正心修身齊家之說者其流波漫矣僕以為夫子於是一章則其發微也顧第弗深考耳周兄之別因誦其說以求善否他日願有以告僕則僕平生所敬者尚不謬也

送周允升序

周兄允升以學問聲湘中常平使者館之數月矣一旦過僕言歸則將奉其先府君練事允升冢嗣也必親之嗟乎可謂無違禮哉始僕丁酉秋識允升于長沙見其



議論純正抱負不碌碌且其學于南軒者以孔孟為宗以孝弟為本而踐履則其事業也夫人所自致必也親喪苟有玷缺他美莫掩允升名賢者也其慕親之心慥慥無二不以在亡為間本固源深百行之所由充也可不謹歟自學與行判為兩塗而世之篤於榮者踈鹵於允蹈之際蓋三年之愛宰予氏不之省也今允升皇皇然歸感乎猶孺慕之日則不遠而復吾固於允升觀其學與行將無愧怍哉昔晉人自秦歸有贈之策者彼淺

丈夫示已有謀耳朋友之誼交相發以進於善可也允升  
視僕斯言其秦人之策乎將他山之石也

送廬陵李舜臣序

始僕幼時學于新喻楊先生先生每為僕言江右儒學  
輒推廬陵為巨擘少長聞大參董公與今大學胡公內  
相周公祕監楊公以節概尊用於朝蓋日誦高山仰止  
之詩而未見其人也淳熙丁酉冬以息子欲受一經因  
耒陽尉李元大得請于其族黨舜臣惠然為湘中之游

且相從乎益水之上春容三載矣僕於是熟其為人沈  
靜端慤周於與人而詳於教術也其學本乎經而博之  
以史傳百家之言具文粹乎溫純而時出乎瑰偉振厲  
之作益其胸中涵養之深厚而其發之於外僕得於淑  
艾切磋之間大畧如此新喻先生之言至是益信今年  
春興賢之詔下舜臣曰吾親念游子秋賦且邇吾歸矣  
將行僕願有言焉君子之學素所蘊蓄將施之當世要  
是富貴非所患後世之士不慥慥於言行以輕於時而

君子不爾也舜臣州里父兄如前數公立朝行已殆與  
講學時宜無涇渭則夫得名于世必于此求之舜臣與  
僕平居劇僕逆探其所未為當不媿此今胡公以耆德  
方進用結綬彈冠舜臣有日矣夫學成于內用周于外  
挾是以遊世君子之所尤重也蓋僕聞其人三十餘載  
而見之則其望之者宜不輕矣昔吳人至鄭鄭人獻紵  
衣焉紵衣未必貴於吳而鄭人之貴如此不敢愛也舜  
臣視僕此言為鄭人之紵衣乎將越之章甫也

文簣序

周書曰為山九仞功虧一簣魯論曰譬如為山未成一簣止吾止也譬如平地雖覆一簣進吾往也嗚呼九仞之山世俗所謂畏縮而難能者有能自一簣而積之則終亦必至而已矣昧者方以一簣而虧其成而可哉是蓋未知古人充之之說也孟子之言曰人能充無欲害人穿窬之心則仁義不可勝用予亦為之說曰人能充一簣而進之心則奚九仞之可勝為哉是說也嘗試用

之於文焉以為文不可以苟作也尚矣予之於文非所  
敢知也然方與翰墨從事不能無所為既已為之而又  
憚其不可苟作以自棄於不敢知孰與知所以充之庶  
乎猶在吾往之科是予於文之志也雖然且欲它日自  
附于為山之萬一則是不可無所考見矣故隨其所得  
抄而存之表以文簣予志也抑以自警云故夫子之說  
非為山之說也為文之說也非為文之說也推而至於  
天下之事無乎而不可也因叙其說以俟同志隆興壬

午三月省齋庚子天民識

論

田制論

自秦開阡陌壞井田於是魚并縱橫而貧富相絕上無制  
民產之法而趨末者益衆漢興未能復古高祖五年之  
詔令民各歸其縣復故田宅與從軍高爵先與田宅初  
不為天下畫一定制觀其言曰夫有功勞者田未能如  
法而小吏顧多滿此無制之弊也其後從齊楚大族關中

亦與利田宅而已惠帝高后之際頗知務農舉力田者  
復其身置力田秩二千石至於文帝尤加意焉詔為農  
而下者歲相繼也以為農天下之大本既開耜田親耕  
以率之又時賜田者半租以戶口置力田常員其後遂  
除田之租稅古人注意田農無以過此以歲比不登而  
曰度田非益寡而食之不足帝胡不思其故端由貧富  
之不等耶一時議臣如賈誼以趨末衆而亡蓄積則欲  
毆民歸農而著之本使天下各食其力晁錯以地有遺



利民有遺力生穀之地未盡墾游食之民未盡歸農則  
欲務農而貴粟皆可謂知本務矣惜其田制不立而無  
田之民竟亦未能均被其澤兼并豪黨役財驕溢而窮  
貧無田者猶故也武帝慨慕治古多所改作獨於田農  
未有良法方且內興功利役費並興而民益去本董仲  
舒思救其弊建言自秦除井田富者田連阡陌貧者亡  
立錐之地又加屯戍力役一歲三十倍於古田租口賦  
鹽鐵之利二十倍於古或耕豪民之田見稅什五故貧

民常衣牛馬之衣而食犬彘之食以為井田法理難卒  
行宜少近古限民名田以贍不足仲舒之意亦可謂善  
於復古漸而不遽然而施行之畧當時莫之講也未年  
僅知征伐之悔以力農為務趙過代田之法平都令光  
輓犁之制特田農之一助耳至哀帝之世師丹本仲舒  
之說建議名田謂豪富吏民訾數鉅萬而貧弱愈困宜  
畧為限天子下其議丞相孔光大司空何武條奏其制  
王列侯得名田國中列侯在長安及公主名田縣道關

內侯吏民名田皆無得過三十頃賈人不得名田犯者以律論諸名田過品皆沒入縣官夫三十頃古三十夫之田也一家而兼三十夫之田制亦寬矣丁傳用事董賢隆貴猶不便之詔書頒後卒寢不行漢家田制大抵若此惜其去古未遠而不能少復古制誠可恨也王莽一旦得志乃一切純以古法更名天下田曰王田不得賣買男口過八而田過一井者分餘田與九族鄉黨犯令至死然莽之亂亡非由井田之復其他政諄亂雖有

良法不足恃也况復制度不定吏緣為姦正以益亂爾它日雖曰令得賣買勿拘以法卒亦無救於禍以是知莽之亂亡果非復井田之所致雖然漢固無田制而其盛時海內富庶衣食滋殖至興禮義而公上之積陳陳相因是果何術哉此獨文景之君崇本務農民從其化其效乃爾向使井田之法未廢當與成康比隆可也然則田制既廢之後人君之務農者如文景可也

賦法論

秦人收大半之賦不足以贍具欲民怨而潰兵亂相乘  
人失作業漢興根本蜀漢軍旅糧費仰給於此蕭何留  
巴蜀收租以給饟已而得敖倉之積間亦復蜀漢二歲  
勿租稅然算賦之起則漢四年八月也民年十五以上  
至五十六人歲賦錢一算算為錢百二十以治庫兵馬  
而山川園池市肆徃徃皆有租稅至田租所出什五而  
稅一蓋田稅輕於古而雜賦則非古矣其後十一年以  
吏諸侯王多賦為獻而未有程乃下省賦之詔然則自

縣官租賦之外益又有增多者至是乃以口數率錢人  
歲六十三以給獻費此外又有更賦說者以為秦法漢  
初因而行之曰卒更正卒無常人皆當迭為之踐更則  
顧貧者為之皆月為錢二千居更縣中至五月乃更其  
後歲率一月而過更則凡天下人皆戍邊歲三日雖丞  
相子亦與戍邊之調其不行者日為錢百以給戍者其  
後有謫乃戍此漢家租稅之始也田租雖輕於古自高  
祖時已輒中廢惠帝立乃復減而從初文帝之時再賜

民田半租其後遂除田租稅其意以謂農塵身從事而有租稅則本末者無以異蓋漢法天下均有算賦獻費而農且出田租則比末作者增矣文帝殆有見於此也至景帝初復令田半租則三十而稅一視古亦十省六七大畧漢法算賦之屬數十倍於古以是共車馬兵甲士徒之役府庫賜予之用而田租山澤之稅獨給祭祀及天子共養百官祿食庶事之費此文景之君事從儉約則田租宜可減而除也武帝奢廣自肆內有宮室之

營外事征伐之舉租賦不足以給於是言利者始得志  
元光末初算商車則商賈諸物車船之屬甚者率為緡  
錢二千而算一輶車一而算二船積五丈亦算一而其  
輕者亦四千一算輶車一算至元狩中緡錢亦有算矣  
緡錢千則為算二十其後復下告緡之令增口賦之錢  
有馬口之歛而租亦有取於律外漢家賦法繁重莫此  
時為甚昭帝始元六年乃令民得以律占租其後或詔  
毋歛馬口錢毋收口賦勿收逋更賦又時得以菽粟當



賦最後減口賦錢什三繼武帝虛耗之餘未幾百姓充實豈非輕徭薄賦之效歟宣元成哀之時或以郡國災害詔蠲租賦它亦無大更革獨宣帝用耿壽昌之請增海租三倍而甘露中因祥瑞赦天下減民算三十元帝初元中用貢禹之議令民產子七歲乃出口錢成帝建始中因初祀南郊減天下賦錢算四十大畧漢租賦之法有田租有山海川澤市肆之租有算賦有更賦有馬口錢出於田者一而出於它者蓋十數而田租為特輕

此蓋高祖懲秦之弊特優農民而文景又加意焉雖以武帝賦歛繁重而田租亦未見增多然他稅悉倍矣農田亦安獨裕耶此漢氏賦法之大畧也

表

代林昌化謝到任表

剖符內府乘障炎洲鯨海恬波不異天池之澤熊輜憑軾猶存官府之儀已佩印章備宣德意臣中謝伏念臣猥叨世賞粗謹官常試邑庸庸僅供吏責佐州碌碌無

補邦條曾何有於事功乃漫蒙於器使惟今儋耳之地亦古嶺南之區遷客變夷學徒未廢貧儒守靜俗化尚存雖蠻蜚之混并由郡縣之分畫仁無異遠教實暨南茲蓋伏遇皇帝陛下溥愛亡私求人弗備謂臣頗知父教或有朴忠察臣不以家辭可更遐陋顧令假守因以課功臣敢不寶之不貪體夫無怠奉法循理當如庭陛之前奮衛揆文庶飭民夷之俗

狀

代知衡州劉寺簿清之奏狀

臣不肖蒙恩假守當大比之歲檢察生徒課業修治試  
闈牆屋因思取士常規不可不謹招賢大務不可不思  
竊譬之木栽培牙甲於方生未若揀擇棟梁於已就也  
此邦山川清絕風俗淳龐戶一十八萬土產僑寄不無  
可用之才臣伏見朝奉大夫主管建寧府武夷山冲佑  
觀王鎮詳練端實有士大夫之操服勞州縣所至可紀  
安恬自好知之者少昨知沅州任滿請祠杜門息交人

有詣門問其為政諄諄告之言皆可行而不背理及其  
尚健宜取以備任使布衣劉德老清介靜順有君子之  
風飯糗茹草林居自樂者二十餘年不入州縣不應科  
舉鄉里推重以為準則迪功郎前岳州巴陵縣尉廖某  
孝友廉平有人子之節年逾四十始得一第甫尉巴陵  
母老不能與俱解官歸養德老某各有文學智識若使  
之教授參佐近鄉州軍必能成就人才經理民事三人  
所居皆在臣封內敢敬以聞伏覩赦書許長吏保明不

求聞達之士臣竊以謂不求聞達不必專是山林隱淪  
若鎮之求祠自逸德老之恬於林野某之篤於親養若  
非如臣之愚僭有奏陳則鎮等誓不希進常甘棄捐誠  
可惜也臣昨通判鄂州權領州事搜擇軍卒西北子弟  
鄉貢進士李世昌鄉貢進士任南仲區區設心以為世  
昌之質可贊戎事南仲之能可行軍旅願賜審實特與  
補授名目已蒙樞密院得旨令總領都統之臣津發今  
來欲望聖慈檢照先奏行下催促赴闕施行若不以臣

言為妄使凡令長吏皆得依古薦士一州得二三人則何憂人才之乏臣以為為郡之職莫先於此報君之義莫大於此到州之三月冒昧敷聞庶幾小補至於僭瀆犯分之誅臣不得而逃也

迓宋憲先狀

肅將使指欽按詳刑持斧而衣繡衣籍甚建功揚名之畧升車而命御者嚴乎廣觀遠聽之風六轡光華百城震竦某甫焉去列歸為養親泛洞庭青草而來幸少休

於奔走望駭駕赤帷之至竊自慶於遭逢方修斂板之容以快承顏之喜

迂趙鹽先狀

肅擁駟車初臨湘部褰幃警俗威已聳於羣心賦政宣恩歡咸正於王面某一廛巡屬之內三詠皇華之章仰德使星喜見揚輝之燭修容櫺具行輸據地之恭

迂汪憲先狀

肅擁節旄按行屬部列城傾竦一道澄清某負弩攸司



瞻星所次望塵而拜佇修斂板之恭據地而言竊有承  
顏之幸

迓林倅先狀

肅嚴旌旆行次治封千里歡愉一時鼓舞某職司負弩  
心切拜塵屬繡衣之西來方効榜舟之役瞻緹屏而北  
望可量飛羽之心顧百罰以何辭察一身而幸恕

迓樊鹽先狀

被光華之禮樂行清絕之山川入境觀風威已先于驅

弩寒帷警俗望尤竦于輶車某竊伏湘濱敬瞻星采敢  
修櫛具之飾行拜繡衣之容

迓劉守先狀

佩太守之章擁東方之騎誠明所格寧聞羸服以間行  
教令自孚已覺移書而翕聽某一廛望澤三沐歸心夙  
與民編引領率先之化將從童稚修容迎拜之期